

«Pcd vul esser segund ferma partida en Grischun»

La pcd preschenta sias finamiras e nominescha ses candidats e sias candidatas per las elecziuns en il parlament federal

DA MARTIN CABALZAR

■ La radunanza da nominaziun è vegnida introducida cun in votum programmatic dal parsura da la pcd grischuna, cusseglier dals chantuns Stefan Engler. Allura han las candidatas ed ils candidats da la glista principala preschentà vicendaivlamain lur conaspirants, demonstrond uschia la necessitad d'in bun spiert da team per la champagna elettorale. Suenter questa preschentaziun èn els vegnids nominads cun acclamaziun.

Las empermischuns da la pcd a favor da la singularitad grischuna
Tenor Stefan Engler è la pcd «la partida dal federalissem, da la golvaziun e da la coesiun». La pcd grischuna veglia dar al Grischun ina vusch a Berna per che noss chantun muntagnard e perifer na vegnia betg emblidà. Ils exponents da la pcd s'engaschian fermamain per investiziuns en in'infrastructura effizienta, saja quai per la viafier, per las vias u per la rait digitala. La pcd s'engaschia plinavant per mantegnair in service public cumpetitiv che merita ses num. Era la populaziun muntagnarda duai pudair profitar da bunas cundiziuns da viver. La pcd haja quietà dal clima, da la natira e da la cuntrada e sustegnina ina golvaziun commensurada dals interess socials, ecologics ed economic.

Tenor Engler giudian las famiglias vivant il sustegn da la pcd, quai cunzunt per stgaffir cundiziuns da rom favuravlas a la famiglia, saja quai en la travaglia quotidiana, en scola ed en il mund da lavur, en la tgira dals confamigliars e per premias supportablas tar las cassas da malsaus.

Stefan Engler e Martin Candinas sco tandem cumprovà

Cusseglier dals chantuns Stefan Engler vules represchentar il chantun Grischun per in'ulteiura perioda en il cussegl dals chantuns. Engler è stà da 1998 fin 2010 cusseglier guvernativ e schef dal Departament da construcziun, traffic e forestal-esser dal Grischun. Dapi 2012 presidi-cha el la pcd grischuna. Il giurist ed advocat, oriund da Surava ed uss domicilià cun sia famiglia a Cuira, dispoia d'ina



Preschentaziun da las candidatas e dals candidats da la pcd per las elecziuns naziunales: (da san.) Carmelia Maissen, Franz Sepp Caluori, Gianna Luzio, Stefan Engler (cusseglier dals chantuns), Yvonne Brigger-Vogel, Martin Candinas (cusseglier naziunal) e Kevin Brunold (parsura da la cumissiun elettorale). FOTO M. CABALZAR

vasta experienza sin tut ils trais stgalims statals e sia prestaziun politica è respectabla. Tant en il Grischun sco a Berna giuda Engler in'excelenta reputaziun sur las partidas or, cunzunt era per sia tenuta ponderada e sia abilitad da furmar maioritads era per dumondas politicamain complexas. Per Engler è politica «servetsch al model da success svizzer».

En las ultimas elecziuns n'han tant el sco Martin Schmid (pld) gi nagina currenza, questa giada ha tant ils socialdemocrats sco ils populars annunzià ina ev. candidatura.

Per in'ulteiura perioda d'uffizi en il cussegl naziunal candidescha Martin Candinas che fa part da quel gremi dapi l'onn 2011. Avant è il stà da 2006 fin 2010 deputà da la Cadi en il cussegl grond. En il cussegl naziunal fa il bab da trais uffants part da la cumissiun da traffic e telecomunicaziun, da la cumissiun da gestiun e da la cumissiun da surveglianza da la Neat. Dapi 2012 fa Candinas era part dal presidi da la pcd svizra. Sco cusseglier naziunal è el s'engaschà cunzunt per posts da lavur e per in svilup prosperont en las regiuns muntagnardas, per in service public che merita ses num,

per la construcziun ed il meglierament da l'infrastructura stradala e da viafier sco era per in turissem ferm ed innovativ e per rinforzar la forza idraulica e per promover ina mobilitad climaticamain neutrala, per realisar l'infrastructura digitala e per sustegnair la varietad da medias e linguas en noss pajas quadriling.

Ina ferma glista

Sin la glista principala da la pcd figureschan plinavant la presidenta communalad Ilanz/Glion e deputada dalla Foppa Carmelia Maissen. Ella ha studegià architettura e doctorà en istorgia d'art ed architettura. Ella ha acquistà vastas experienzias en la politica regiunala sco manadra da project e sviluppadra da la Regiun Viamala e sco commembra dal parlament regional Surselva.

Franz Sepp Caluori represchenta il cumin da Cuira dapi 2014 en il cussegl grond. El è actualmain president da Gastro Grischun e maina sco conditor-confiseur dapi passa 30 onns il Café Caluori a Cuira.

Yvonne Brigger-Vogel è mamma da dus uffants è mainagestiun da la Cuminanza d'interess per il turissem grischun e dapi

2011 manadra d'in'atgna interpresa en las spartas svilup turistic, management da qualitat e comunicaziun.

Gianna Luzio è dapi l'october 2018 secretaria generala da la pcd svizra. Da 2013 fin 2018 è ella stada referendaria per ils dossiers da finanza, economia e sanadad en il secretariat general dal Departament federal da l'intern. Avant ha la geografa d'economia lavurà en ils servetschs dal parlament e dal secretariat statal d'economia (Seco).

Grond sustegn da la pcd giuvna

Fetg satisfatga è la pcd dal Grischun cunzunt era da las duas glistas da la pcd giuvna. Tut en tut stattan 10 commembers da la pcd giuvna, sis giuvens e quatter giuvnas, a disposiziun per las elecziuns dal cussegl naziunal. Quai èn: Catrina Ventrice (Cuira), suppleanta da deputà, Francine Walser Hemmi (Curvalda), suppleant da deputà Fabian Collenberg (Cadi), Tobias Marty (Cuira), deputà Kevin Brunold (Foppa), deputà Tino Schneider (Cuira), deputà Severin Geissler (Vaz Sut), suppleanta da deputà Sandra Lazzarini (Cuira), la studenta d'economia Sarina Caduff (Cumbel) ed il commer-

ziant Anton Capaul (Lumbrein/Cuira). La pcd è pia apparentamain er activata per persunas giuvnas.

Tenor il schef da la cumissiun elettorale Kevin Brunold è la pcd grischuna persuadida d'avair ina glista ferma e regiunalmain bain equilibrada cun persunalitads bain enconuschantas. El regorda ils preschents a la fulminanta campagna elettorale per las elecziuns da la regenza ch'han purtà cun Mario Cavigelli (vegl) e Marcus Caduff (nov), suenter 20 onns puspè, ina represchentanza dubla da la pcd en la regenza grischuna. Era la nova fracziun dal cussegl grond lavuria cun engaschament e saja actualmain la fracziun la pli dominanta en il cussegl grond, remarca Brunold.

Per las elecziuns naziunales da quest atun disponia la pcd dal Grischun d'excelentissimas candidatas e d'excelentissims candidats. Ensem cun l'entira famiglia da la pcd veglia la cumissiun elettorale s'engaschar da tutta forza per che la pcd fetschia in fitg bun resultat en las elecziuns da quest atun. Per che quai reusseschia stoppia la pcd dentant serrar las retschas e mobilisar l'electorat, appellescha Brunold als preschents.

Gerhard Pfister: Ludà e mobilisà

Il president da la pcd svizra tar la chantunala

■ (anr/gc) A la radunanza da nominaziuns da las candidatas e dals candidats da la pcd grischuna a Landquart ha er il president da la pcd svizra, cuss. naz. Gerhard Pfister, assistì – sco quai ch'el fetschia tar tuts inscuters da nominaziuns da las partidas chantunales. Cun il Grischun ha il parsura da la partida svizra ina relaziun detg stretga, avend frequentà il gimnasi e fatg matura a la scola claustrala a Mustér nua ch'el haja passentà impurtants onns da sia giuventetgna. El ha ludà la pcd chantunala dal Grischun per ses grond success dal l'onn passà tras avair dumagnà en onurificamain cun cuss. gov. Marcus Caduff in segund represchentant da la pcd en la regenza – sper cuss. gov. Mario Cavigelli.

Plaschair ha il parsura era che la pcd – cun ses buns candidats e candidatas – survegnia supplementarmain sustegn tras duas glistas da giuvnas e giuvens candidats per Berna. I saja dentant tuttina da far gronds sforzs e mobilisar il potenzial d'electurs ed electuras.

La pcd dal Grischun saja cun cuss. dals chantuns Stefan Engler e cuss. naz. Martin Candinas la suletta partida gri-

schuna cun ina represchentanza dubla e profilada a Berna tant en il cussegl naziunal sco en quel dals chantuns. Blera speranza ha il president da la partida svizra perquai era ch'i reusseschia a la pcd d'augmentar la procentuala tar l'electorat en il Grischun.

Pli gronda giustia fiscal plus daplis meds per la AVS

Ils 19 da matg ha il suveran svizzer e grischun da vuschar sur da divers projects. Sin giavisch dal directori da la pcd grischuna ha il president da la pcd svizra infurmà davart la votaziun federala pertu-

tgant refurma fiscal e la finanziaziun da la AVS (RFFA) che vegnan sco pachet avant il pievel. Quai porta a la AVS plien-tradas da duas milliardas francs ad onn ed in pli fair ed equilibrà sistem da taxaziun per interpresas internaziunales.

La Svizra è attractiva pertutgant taglias per interpresas internaziunales cun blers plazs da lavur e taglias. Quels privilegis n'èn betg renconuschids internaziunalmain. Quai portia er ina discriminaziun per firmas svizas en l'exteriur. La proposta schliass quest problem cun in fair ed acceptà sistem internaziunal da taglia per tuttas interpresas. Il pachet dubel promovia uschia era bainstanza e giustia.

I sa tractia d'ina buna, equilibrada e necessaria schliaziun dubla. Per quella è surtut la pcd s'engaschada fermamain. La gronda maioritad da la pcd chantunala sustegna las propostas per la refurma fiscal e la finanziaziun da l'AVS cun be tschintg vuschs cunter ed ina abstenziun.

Salvar la chatscha speziala

L'iniziativa per dismetter la chatscha speziala en il Grischun è vegnida preschentanada cuntradictoriain sut la modera-

tura Ursina Staub, redactura da Samedia. Pro han argumentà: Renatus Casutt e Jakob Dönn dal comitè d'iniziativa, e contra: Robert Brunold, parsura dals chatschadurs grischuns e Nina Gansner, mainagestiun da la Selva, l'Uniuin dals possessurs da gaud en il Grischun.

I ha dà ina viva orientaziun e discussiun davart blers detagls centrals cun mainis ed opziuns zunt cuntrarias. Ditg curt: Ils davos onns n'èsi betg reussi a la regenza da regular l'effectiv fixà da la selvaschina durant la chatscha auta sco previs. Perquai è vegni ordinà ils davos onns ina chatscha speziala. Durant quella dettia in scenas e succedian fatgs vers la selvaschina (animals purtants ed anseuls) che na sajan moralmain ed eticamain na da responder. Sin il temp da copulaziun è perquai da prender resguard. Era perquai saja la chatscha speziala da dismetter. La regulaziun da l'effectiv tar la selvaschina duai vegnir cuntanschida durant la chatscha auta. Persuenter duajan ulteriuras mesiras ed adattaziuns vegnir introducidas.

Ils mainis eran dentant gia fatgs. La votaziun ha mussà che la gronda maioritad è encunter da scumandar la chatscha speziala, 12 eran pro e trais èn s'abstegnids.



Cun sia preschientscha sco giast e referent ha il parsura da la pcd svizra Gerhard Pfister (amez) – flancà da cusseglier dals chantuns Stefan Engler (a san.) e cusseglier naziunal Martin Candinas (a dretga) – undrà e dà sustegn a la pcd grischuna. FOTO TH. GSTÖHL